



Број/Број: **01/2а-50-1-2-54/09**  
Сарајево/Сарајево, 5. 11. 2009.

**ZAPISNIK**  
**54. sjednice Komisije za vanjske poslove**  
**Predstavničkog doma Parlamentarne skupštine BiH,**  
**održane 3. 11. 2009.**

Sjednica Komisije počela je u 11 sati. Sjednici su prisustvovali: Slavko Matić, Milica Marković, Husein Nanić, Sadik Ahmetović, Azra Alajbegović i Denis Bećirović.

Osim članova Komisije, na sjednici su bili: Branko Dokić, poslanik u Predstavničkom domu PSBiH, i Almir Kapisazović iz Ministarstva finansija i trezora BiH.

Zapisnik su vodili Merdžana Iglica, sekretar Komisije za vanjske poslove, i Miroslav Stanišić, stručni saradnik u Komisiji za vanjske poslove.

Sjednicom je predsjedavao Slavko Matić, predsjedavajući Komisije, koji je prisutne upoznao s dnevnim redom 54. sjednice.

Denis Bećirović predložio je da se u dnevni red uvrsti tačka, odnosno inicijativa da se na jednu od narednih sjednica Komisije pozove ambasador Srbije u Bosni i Hercegovini s kojim bi se razgovaralo o otvorenim pitanjima između dvije zemlje, s posebnim osvrtom na slučaj Ilije Jurišića.

Azra Alajbegović pitala je da li je Poslovníkom određeno da se na sjednice Komisije za vanjske poslove mogu pozivati ambasadori drugih država i još predložila da se tema razgovora proširi i na pitanje prihvatanja ambasadora BiH u Srbiji.

Merdžana Iglica odgovorila je da je u Poslovníku jasno rečeno da je kompetencija Komisije komunikacija s ambasadorima stranih a posebno susjednih država.

Milica Marković kazala je da nema ništa protiv da se ova inicijativa uvrsti kao tačka u dnevni red neke od narednih sjednica Komisije za vanjske poslove, dodajući da za današnju sjednicu nema nikakvog materijala, odnosno pisane inicijative s obrazloženjem. Kazala je da sada već ulazimo u suštinu tačke dnevnog reda, što bi trebalo da bude u dostavljenoj inicijativi, nakon čega bi se izjasnili o tome.

Denis Bećirović precizirao je da je za njega ovo inicijativa o pokretanju inicijative i da je njegova namjera bila da ova komisija pokrene inicijative, a da bi na današnjoj sjednici mogli razgovarati o tome, odnosno precizirati o kojim pitanjima bi razgovarali s ambasadorom Srbije.

Husein Nanić kazao je da već imamo u dnevnom redu današnje sjednice, u inicijativi Branka Dokića da Predsjedništvo BiH podnese Predstavničkom domu pismeni i usmeni izvještaj o odnosima sa susjednim državama i da, ako će pitanja koja je naveo Denis Bećirović biti sadržana u tom izvještaju, nema potrebe da se dva puta radi isti posao.

Slavko Matić kazao je da se od Komisije za vanjske poslove, u vezi s inicijativom Branka Dokića, očekuje da kaže da li podržava inicijativu da se to uvrsti u dnevni red sjednice Predstavničkog doma, ne ulazeći u sadržaj šta će i kako Predsjedništvo BiH uraditi po tom pitanju.

Denis Bećirović kazao je da se, kada je riječ o inicijativi Branka Dokića, ona odnosi na odnose sa svim susjednim zemljama, dodao je da BiH ima ambasadore u Hrvatskoj i Crnoj Gori, da je očigledno da su trenutno najveći problemi između BiH i Srbije, te predložio da se inicijativa Branka Dokića ne miješa s njegovom inicijativom i da kroz ovu inicijativu uvedemo praksu razgovora s ambasadorima koju do sada nismo imali.

Članovi Komisije su nakon toga, s pet glasova „za“ i jednim „protiv“, prihvatili da se u dnevni red današnje sjednice Komisije kao četvrta tačka dnevnog reda uvrsti inicijativa Denisa Bećirovića da se na neku od narednih sjednica Komisije za vanjske poslove pozove ambasador Srbije u BiH.

Za 54. sjednicu Komisije za vanjske poslove usvojen je sljedeći

## **DNEVNI RED**

1. Usvajanje Zapisnika 53. sjednice Komisije;
2. Davanje mišljenja o saglasnosti za ratificiranje:
  - a) Sporazuma o finansiranju između Bosne i Hercegovine i Komisije Evropskih zajednica u pogledu „Jadranskog prekograničnog programa saradnje u okviru IPA-e“ u okviru instrumenta prepristupne pomoći (resorno ministarstvo: Ministarstvo finansija i trezora BiH);
  - b) Sporazuma između Vijeća ministara BiH i Vlade Kraljevine Danske o razvojnoj saradnji (resorno ministarstvo: Ministarstvo vanjskih poslova BiH);
3. Razmatranje inicijative poslanika Branka Dokića o tome da „Predsjedništvo BiH Predstavničkom domu PSBiH podnese pismeni i usmeni izvještaj o odnosima sa susjednim državama“;
4. Inicijativa Denisa Bećirovića da se na jednu od narednih sjednica Komisije za vanjske poslove pozove ambasador Republike Srbije u Bosni i Hercegovini;
5. Izvještaji i materijali pristigli Komisiji:
  - Parlamentarna saradnja Bosne i Hercegovine i Republike Italije (materijal MVP-a BiH);
  - Liberalizacija viznog režima – Sjednica Komiteta za građanske slobode, pravdu i unutrašnje poslove Evropskog parlamenta /LIBE/- Strasbourg 19.10. 2009. (materijal MVP-a BiH);
  - Liberalizacija viznog režima – Informacija Misije BiH pri EU o razgovorima s pojedinim članovima COWEB-a (materijal MVP-a BiH);
  - Informacija o sastanku ministara obrane EU, Geteborg, 29.9.2009. (materijal MVP-a BiH);
  - Izvješće s četvrtog dijela redovnog zasjedanja Parlamentarne skupštine Vijeća Europe za 2009. godinu, Strasbourg, od 28.9. do 2.10. 2009.;
  - Informacija o novom sastavu Delegacije EP za odnose s Albanijom, Bosnom i Hercegovinom, Srbijom, Crnom Gorom i Kosovom kao i izjava šefa delegacije, (materijal MVP-a BiH);
  - Zabilješka sa sastanaka s novoimenovanim ambasadorima BiH, 27.10.2009.;
6. Tekuća pitanja;

### **Ad.1. Usvajanje Zapisnika 53. sjednice Komisije**

Nije bilo primjedbi te je Zapisnik 53. sjednice Komisije za vanjske poslove usvojen jednoglasno.

**Ad.2.a) Davanje mišljenja o saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu „Jadranskog prekograničnog programa saradnje u okviru IPA-e“ u okviru instrumenta pretpristupne pomoći**

Almir Kapisazović iz Ministarstva finansija i trezora BiH je u vezi s ovim sporazumom kazao da je Evropska komisija, 25.3. 2008., usvojila program prekogranične saradnje u Jadranskom regionu u okviru IPA-e, kojim se predlaže podrška prekograničnoj saradnji između Grčke, Italije, Slovenije, Albanije, BiH, Hrvatske, Crne Gore i Srbije. S ciljem realizacije ovog programa, a s obzirom da je predviđeno domaće učešće u sufinansiranju programa, neophodno je da strane zaključe ugovor o finansiranju, kojim će se definirati odredbe kojima zemlja korisnica pomoći prihvata pomoć zajednice, i pravila i procedure koje se tiču isplate tranši pomoći, uključujući i odgovarajuće metode o odgovornosti za realizaciju samog programa. Prema višegodišnjem indikativnom planskom dokumentu 2007.-2009. godina, Bosni i Hercegovini alocirano je 6 miliona eura. Za provođenje aktivnosti iz ove druge komponente IPA regulativa zahtijeva kofinansiranje korisnika u iznosu od najmanje 15%. U skladu s ovim programom, partneri u budućim projektima morat će izdvojiti zahtijevani iznos za kofinansiranje. Sredstva za kofinansiranje projekata, tehnička pomoć, za trogodišnji period 2007. – 2009. godine u iznosu od 105.916 eura osigurana su u budžetu institucija BiH. On je dodao još da ovaj sporazum ne pretpostavlja potrebu donošenja novih i izmjenu postojećih zakona.

Članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

**Ad.2.b) Davanje mišljenja o saglasnosti za ratificiranje Sporazuma između Vijeća ministara BiH i Vlade Kraljevine Danske o razvojnoj saradnji**

S obzirom da predstavnici Ministarstva vanjskih poslova BiH koje je resorno za ovaj sporazum nisu došli na sjednicu, članovi Komisije saglasili su se da ovu tačku skinu s dnevnog reda.

**Ad.4. Inicijativa Denisa Bećirovića da se na jednu od narednih sjednica Komisije za vanjske poslove pozove ambasador Republike Srbije u Bosni i Hercegovini**

Denis Bećirović je na početku kazao da misli da sve otvorene probleme treba rješavati dijalogom i dodao da misli da je njegova inicijativa skroman način da otvorimo tolerantan dijalog i čujemo iz vizure ambasadora Srbije u BiH kako on gleda na neke probleme. On je predložio da temu razgovora s ambasadorom Srbije definiramo kao „razmatranje mogućnosti rješavanja otvorenih problema u međudržavnim odnosima Bosne i Hercegovine i Srbije“. Dodao je da njegovu inicijativu ne bi trebalo vezati za inicijativu Branka Dokića koja bi trebalo cjelovito da obradi regionalne odnose a posebno odnose BiH s tri susjedne države.

Milica Marković kazala je da je glasala protiv uvrštavanja ove tačke u dnevni red današnje sjednice iz proceduralnih razloga, jer smatra da je bilo potrebno dobiti pisani materijal za to, pripremiti se i na kraju izjasniti. Ona je kazala da to što je glasala protiv uvrštavanja ove tačke u dnevni red nije u vezi s prisustvom ambasadora Srbije sjednici Komisije i da je naprotiv vrlo raspoložena da vidi ambasadora jedne prijateljske zemlje na nekoj od narednih sjednica Komisije. Istaknula je da niko od članova Komisije nema pravo da postavlja i da unaprijed definira stvari prije nego što se neke relevantnije institucije, kao što su Predsjedništvo BiH i Ministarstvo vanjskih poslova BiH, izjasne da li su odnosi između Srbije i BiH problematični ili nisu i da su te institucije relevantnije od jednog člana Komisije da procijene i daju takvu konstataciju. S druge strane, kazala je da smatra da jedan

ambasador ne može dati odgovore na ta pitanja prije nego što odgovore na to ne daju oni koji su pozvaniji i kažu jesu li to problemi ili nisu. Ona je dodala da se neke stvari tendenciozno postavljaju i da je konstatacija da između dvije zemlje postoje nerazjašnjena pitanja mnogo blaža nego da postoje problemi između dvije države. Kazala je da se protivi takvom definiranju stvari jer mi kao komisija nemamo pravo da konstatiramo takve stvari prije nego što to učini, prije svega, Predsjedništvo BiH pa onda Vijeće ministara BiH, odnosno Ministarstvo vanjskih poslova BiH. Što se tiče tema o kojima bi trebalo razgovarati s ambasadorom Srbije, kazala je da bi bilo bespotrebno trošenje vremena i riječi na to da ambasador odgovori zašto je suđeno Iliji Jurišiću zbog činjenice da je on procesuiran u pravosudnom sistemu Srbije. Miješanje u pravosudni sistem i davanje određenih konstatacija na određene postupke i procedure koje su vođene u skladu sa zakonom bilo bi krajnje drsko i neprimjereno od bilo koga drugog, dodala je Milica Marković. Ona je još kazala da bi je radovala činjenica da je podnosilac ove inicijative reagirao kada je prošle godine član Predsjedništva BiH, koji je iz njegove stranke, na veoma vulgaran i neprimjeren način reagirao i okarakterizirao određene visoke zvaničnike Srbije. Na kraju je rekla da je za nju neprihvatljivo da neko postavlja temu i pitanje razgovora kao problemi između Bosne i Hercegovine i Srbije zato što za polovinu ove države, tj. za Republiku Srpsku kao ravnopravan entitet odnosi između BiH i Srbije uopće nisu problematični. U vezi s pitanjem ambasadora BiH u Srbiji i zašto dva ambasadora iz BiH nisu dobila agremane u Beogradu, kazala je da je to pitanje koje treba riješiti na državnom nivou, između predsjednika Srbije i Predsjedništva BiH.

Denis Bećirović kazao je da je njegov prijedlog krajnje korektan i dobronamjeren, te da nije sadržavao nikakve ocjene, osim poziva na dijalog. Svako u ovoj državi treba da radi svoj dio posla, ali isto tako svako ima manju ili veću odgovornost i u okviru svojih mogućnosti treba da napravi manji ili veći korak da stanje u ovoj zemlji i regionu bude što bolje. On je kazao da je vanjska politika u isključivoj nadležnosti države Bosne i Hercegovine i ovde je riječ o državama, tj. Bosni i Hercegovini i Srbiji, a hoće li se Republika Srpska ili neki drugi dio BiH povezati s nekim ekonomski, kulturno itd. to je drugo pitanje. Spominjati sada izjavu Željka Komšića kao člana Predsjedništva BiH a ne spominjati presudu Međunarodnog suda, obavezu Srbije da donese rezoluciju po tom pitanju, u najmanju ruku nije konzistentno, cjelovito i potpuno. On je kazao da s ambasadorom Srbije treba otvoriti pristojan dijalog, uvesti praksu da razgovaramo i na ovaj način. Sutra ćemo možda pozvati i ambasadore Crne Gore, Hrvatske, Slovenije ili neke druge zemlje i pokušati razgovarati o otvorenim problemima, a ne da pokušavamo od najbolje ideje napraviti nešto crno, kazao je Denis Bećirović.

Slavko Matić kazao je da se slaže s konstatacijom Milice Marković da bi u pozivu trebalo da stoji puno primjereniji izraz „otvorena pitanja“ a ne „problemi“. On je kazao da nema iluzije da ćemo mi u razgovoru s ambasadorom nešto značajno riješiti te da to prihvata i gleda na to da ćemo, u informativnom smislu, čuti i drugu stranu.

Denis Bećirović rekao je da za njega uopće ne predstavlja problem da to definiramo kao otvorena pitanja, ali je kazao da predsjednik Srbije, članovi Predsjedništva BiH, ministri vanjskih poslova Srbije i BiH u svojim istupima to javno definiraju kao otvorene probleme.

Azra Alajbegović kazala je da je glasala za ovu tačku dnevnog reda zato što smatra da će se do rješenja o otvorenim pitanjima brže doći i da će ta rješenja biti kvalitetnija ako se u više segmenata izvršne i zakonodavne vlasti govori o njima. Ona je kazala da je na jesenjem zasjedanju Interparlamentarne unije u Ženevi delegacija BiH imala bilateralne susrete s delegacijama Srbije, Hrvatske, Japana i još nekim, te da je s delegacijom Srbije dogovoreno da se organiziraju međusobne posjete delegacija Interparlamentarne unije parlamentima obje zemlje, kako bi doprinijeli što bržem i kvalitetnijem rješavanju nekih otvorenih pitanja.

Husein Nanić rekao je da misli da u ovo mora biti uključeno Ministarstvo vanjskih poslova BiH i da bi trebalo tražiti informaciju od Ministarstvu vanjskih poslova BiH o odnosima i otvorenim pitanjima, pitajući kakva je uloga Komisije za vanjske poslove u razgovoru s jednim ambasadorom o otvorenim pitanjima između dvije države.

Merdžana Iglica kazala je da je u prošlom mandatu Komisija za vanjske poslove slala poziv hrvatskom ambasadoru u BiH da se razgovara o otvorenim pitanjima o luci Ploče i raznim temama, te da je u razgovorima učestvovalo Ministarstvo vanjskih poslova BiH.

Azra Alajbegović kazala je da se slaže da bi uz poziv ambasadoru Srbije u BiH trebalo poslati pismo ministru vanjskih poslova koji bi trebalo da prisutvuje tom sastanku s ambasadorom Srbije u BiH.

Nakon toga članovi Komisije podržali su inicijativu Denisa Bećirovića da se uputi poziv ambasadoru Srbije u BiH na sastanak-tematsku sjednicu u narednom periodu s Komisijom za vanjske poslove Predstavničkog doma PSBiH, na kojem bi se razgovaralo o svim otvorenim pitanjima između dvije susjedne države, uz zaključak da se poziv uputi preko Ministarstva vanjskih poslova BiH i očekivanje da sastanku prisustvuje i ministar vanjskih poslova BiH.

### **Ad.3. Razmatranje inicijative poslanika Branka Dokića o tome da „Predsjedništvo BiH podnese Predstavničkom domu PSBiH pismeni i usmeni izvještaj o odnosima sa susjednim državama“**

S obzirom da je Branko Dokić kasnio na sjednicu Komisije za vanjske poslove, tačka 3. dnevnog reda razmatrana je nakon tačke 4.

Branko Dokić podsjetio je da Predsjedništvo BiH ima obavezu da s vremena na vrijeme podnese izvještaj o vanjskopolitičkim pitanjima. Kazao je da je prioritet za svaku zemlju pa i za zemlje koje su u procesu pridruživanja Evropskoj uniji regionalna saradnja i da misli da postoji niz otvorenih pitanja između BiH i Hrvatske, s jedne strane, i BiH i Srbije, s druge strane. Dodao je da treba razgovarati sa svim susjednim državama o svim otvorenim pitanjima i da nam Predsjedništvo BiH kaže koja su to pitanja, šta je preduzimano povodom toga, nakon čega bi moglo uslijediti više aktivnosti vezanih za to. Kao jedno od ključnih otvorenih pitanja BiH sa susjedima, naveo je neriješeno pitanje korištenja luke Ploče i kazao da smo sada dalje od tog sporazuma nego što smo bili prije pet godina. Naveo je još primjere mosta kopno-Pelješac, pruge Beograd-Bar te bi stoga Parlament trebalo da bude informiran o tome šta se i kako radi po tim pitanjima. Kazao je da ne želi da marginalizira pitanje da li se nekom pojedincu sudi u Srbiji ili BiH, što je ljudsko pitanje, ali da postoje mnogo krupnija pitanja te je zato potrebno da Predsjedništvo BiH izađe s pismenom i usmenom informacijom.

Denis Bećirović kazao je da nema ništa protiv inicijative Branka Dokića i da je njegov stav da je potrebno intenzivirati bilateralne a možda i trilateralne razgovore između tri susjedne države te da svako u okviru svojih nadležnosti treba razgovarati o otvorenim problemima. U tom smislu pitao je Branka Dokića kakva je njegova procjena atmosfere i kakvi bi mogli biti konkretni efekti ove rasprave.

Branko Dokić rekao je da je cilj upravo da se otvori prostor za šire djelovanje svakoga po svojoj nadležnosti, od parlamentarnih komisija do ministarstava, Vijeća ministara BiH i članova Predsjedništva BiH.

Slavko Matić podsjetio je da je obaveza Komisije za vanjske poslove da se izjasni da li će podržati da se ovakva inicijativa nađe na dnevnom redu sjednice Predstavničkog doma.

Članovi Komisije su nakon toga jednoglasno podržali da se inicijativa Branka Dokića, kojom se obavezuje Predsjedništvo BiH da Predstavničkom domu PSBiH podnese pismenu i usmenu informaciju o odnosima sa susjednim državama, nađe na dnevnom redu sjednice Predstavničkog doma.

**Ad.5. Izvještaji i materijali pristigli Komisiji:**

- **Parlamentarna saradnja Bosne i Hercegovine i Republike Italije (materijal MVP-a BiH);**
- **Liberalizacija viznog režima – sjednica Komiteta za građanske slobode, pravdu i unutrašnje poslove Evropskog parlamenta /LIBE/- Strasbourg, 19.10. 2009. (materijal MVP-a BiH);**
- **Liberalizacija viznog režima – Informacija Misije BiH pri EU o razgovorima s pojedinim članovima COWEB-a (materijal MVP-a BiH);**
- **Informacija o sastanku ministara odbrane EU, Geteborg, 29.9.2009. (materijal MVP-a BiH);**
- **Izvještaj s četvrtog dijela redovnog zasjedanja Parlamentarne skupštine Vijeća Evrope za 2009. godinu, Strasbourg, od 28.9. do 02.10. 2009.;**
- **Informacija o novom sastavu Delegacije EP za odnose s Albanijom, Bosnom i Hercegovinom, Srbijom, Crnom Gorom i Kosovom kao i izjava šefa delegacije (materijal MVP-a BiH);**
- **Zabilježka sa sastanaka s novoimenovanim ambasadorima BiH, 27.10.2009.;**

Nije bilo rasprave i članovi Komisije primili su k znanju navedene informacije.

**Ad.6. Tekuća pitanja**

Merdžana Iglica informirala je članove Komisije da je napisala izvještaj o dvomjesečnom kursu u Beču.

Slavko Matić na kraju se zahvalio članovima Komisije i zaključio sjednicu.

Sjednica je završena u 12 sati.

Zapisnik sastavio:

Miroslav Stanišić, stručni saradnik u Komisiji za vanjske poslove.

Sekretar Komisije

Merdžana Iglica

Predsjedavajući Komisije

Slavko Matić

Kopija: MVP-u BiH